

# **Kristian Thalai**

**January 2012**



## *Kum thar, hun thar duhawm*

*Kum thar (kum 2012) chu Pathian zarah kan lo thleng leh ta der mai. Pathian chu Fakin awm rawh se. Kan hriat theuh angin kum kaltaah khan khawvel nasa takin a inlumlet a, ram thenkhatah pheh chuan mipuiin an hruaitute an duh loh avangin kum tam tak ro lo rel tawhte chu thisen tam tak sengin paihthlak an ni a, a rapthlak hle a ni. Hei chauh hi a ni lo, khawvel hmun hrang hrangah hnam leh hnam, chi leh chi inkarah te, sakhua leh sakhaw inkarah te buaina nasa tak khawvel nghawor nghing tham a lo chhuakin hei hian vawiin thlengin zual lam a la pan zel emaw tih tur a ni. Bible-in a lo sawi lawk chu a takin hmuh theih leh hmuh theih lovah a lo thleng mek zel chu a nih hi.*

*Kan ram, Mizoram pawh han thlir kir ila. Nikum chung khan chhiatna thil rapthlak tak tak a thleng nasa hle. Sum leh pai it avanga pawisawilo chung kutthlakna leh inthahna te, pawngsual avanga naupang leh tar te chung thil thleng te kha...a va rapthlak em! Khawvelin kawng engkimah hma a sawn chhoh zel lai hian thil tha lo leh sualna pawh hian a kum tel hian hma a sawn a ni. Kum 2011 chhunga kan rama thil rapthlak tak tak lo thleng ta zawng zawngte kha kum 2012 atang hi chuan lo thleng tawh lo se tih hi kan duh dan a ni theuh ngei ang a. Chutiang a lo nih theihna tur chuan ringtu kan nihna hi a takin lanchhuah tir ila, khawvel entu tur kan nih hi intheihngihl lovang u.*

*Khawvel inlumlet chho zelah hian keini Kohran hote hian eng chinah hian nge mawh phurhna neia kan inhriat le? Lal Isuan amah ringtute chu khawvel entu, chi anga khawvel vawng thatu ni turin min ruat a. He kum thar, hun thar lo inher chhuakah hian kum bul atangin kan mamawh leh mawhphurhna theuh hlen chhuak turin inbuatsaih ila, rilru tharin inpekna thar nen inhlan ang u. Pathian thuin min hrilh lawk ang zelin khawvelah thil a thleng zel a, chu chu chhiar thiam turin finna dil ila, 'kan damchung nite chhiar dan tur min zirtir ang che, finna thinlung kan neih phah hialna turin,' tiin.*

*Mihring taksa hi chu kan hrisel dan leh kan hun tazun dan athua tihthar theih loh chin a awm ngei mai. Mahse kan rilru leh kan ngaihtuahna hi chu englai pawhin a tihthar fo theih a ni. In thar luah ang deuhin tunah hian kum thar 2012-ah kan lo lut fan mek a. He kum thar hi engmahin a la tihbalh loh, hun thar, hun thianghlim a ni a. Rilru thar leh thianghlim tak pua kan luah theuh theih nan leh Lalpa tan inpekna thar kan neih theih nana **kum thar, hun thar duhawm** lo ni thei se a duhawm ngawt mai ♦*

# HLIMTHLA



## CONFERENCE HLABU TIHDIKNA

1. Phek 4-na Zawlawlnaah:
  - (a) Ngai teh nun a dang zo tih hla a *nun* hi *hun* tih tur.
  - (b) Himna kulhpui phuahtu K.L. Engkima tih zawk tur.
2. No. 4-na Phuahtu hi Lalrintluanga tih tur a ni a, a thunawn bass tlar hmasa hi hetiang a tih zawk tur a ni e.
 

{ .d ,d |f,i,f.i.- ,f.i:- .,f,i|s| .s| :-,s,i.- ,s|l| :- .,l|d .d,d :-,d. }
3. No. 6-na thupui hi *Ngai teh hun a dang zo ta* tih tur a ni.
4. No. 19-na tlar hnuai ber hi a *tawpna atan* tih tur a ni a, he mi tlar vek colon pahnihna a thu a, '*chuan*' tih zawnah hian *pause* dah bawk tur a ni.
5. No. 21-na thunawn thumal tawp ber; *hmunah* tih hi *naah* tih zawk tur a ni.
6. No. 27-na El-Bethela hi a hla *harmonise* tu niin a thluk hi Upa Sanglianthanga tih tur a ni e.
7. No. 31-na a H.S. Lalchhuanawma hi Selesih khuaa cheng tih zawk tur a ni.
8. No. 32-na chang hnihna tlar hnihnaa '*la*' tih hi paih tur niin tlar khatna bass part hi hetiang a tih zawk tur a ni e.
 

{ :s| |d :d .d :d |d.d :d :-,d |l| :l,l,l:d |d.d :f,i,f.i.- ,s|,s,i.-|s| :- }
9. Phek 79-na a Fellowship programme-a Chaltlang Bial item hi *Band* ni lovin *Drama* tih tur a ni a, phek 80-na a hla hriltu hi Nl. Lalhriattluangi Ralte tih tur a ni.

Heng tih sualah hian ngaihdam kan dil e.

General Conference 2012 Hlabu hi copy 40000 (singli), a pangngai 35000 leh spiral binding 5000 chhut a ni a, a pangngai hi ₹ 20/- a hralh niin spiral binding hi ₹ 30/- a hralh a ni a, Synod Bookroom Headquarter leh Branch tinah zawrh chhuah mek a ni.

## ṬHALAITE U...

— Rev. Thangzauva  
Synod Moderator



**H**un leh kum chung a thuneitu Pathian chuan kum 2012 chu a rawn herhchhuahtir leh ta mai a. Phu vang leh chak leh theihna vanga thlen tur ni ta sela tuman he kum thar hi kan daikai zo lovang. Pathian khawngaihna avang liau liauva thleng thei kan ni a; chuvangin a hnenah lawmthu i sawi ang u. Tlang tin leh mual tina Kristian Ṭhalai awm zawng zawngte Pathian hmingin Kumthar Chibai ka buk vek a che u.

Kan ṭhalai hruaituten kumthar thuchah zia k tura min sawm avangin ka lawm hle a. He kumtharah hian heng thil te hi i ngaihtuah thar leh ang u.

1. **Mi vannei tak ka ni :** Vanglai nun pawh hmang thleng zo lova mi tam takin mual an liam tawh hnuin, nang leh kei chu Pathian khawngaihna changin hun tharah hlankaiin kan awm a. I ṭhat lai hun, i vanglai ni hmang theia i awm hi vannei tih i inhria em? Pathian hnenah

lawmthu sawi rawh. He kum tharah hian thil ṭha ti leh thei turin, ṭanpui ngaite ṭanpuia, Pathian rawngbawl turin, nun petu tana inpekna hun remchang a siamsak che a ni tih i hria em? Chhan neiin min hruai thleng a ni tih hriain, kan nun chhan, kan dam chhan tihhlawhtlinna hun ṭha pek kan ni hi a vanneithlak hle. Hmang ṭangkai ang aw.

2. **Kan vanglai hun a rei dawn lo :** Mihring nun rei zawng - kum 70/80 vel hi Bible chuan chhum rei lo tē lo lang a, ral leh thuai ṭhin ang te, pangpar vul chuai leh mai ṭhin ang te, hlim ral leh mai ṭhin ang tein a tehkhina. Kristian Ṭhalai nih hun chhungkum (14-40) hi a ral thuai dawn. Hun rei lo te i la neih hi hlim takin, engthawl takin, lungawi takin, ṭangkai leh hlu takin hman tum hram ang che. Tum mumal neiin, inchhir leh tawh lohna turin i thiltih zawng zawngah Lalpa hriatna telin hmang la, i la lawm ngei ang.

3. **Fimkhur takin aw** : Mahni taksa leh nun atana tha lo tur pawh dawn lek lova mahni nun tichhia a, thihna hruihrualin a zem buaina kara leng mi tam takan awm lai hian, nang erawh chuan i nun leh hun te fimkhur takin hmang la, i la inchhir lehna tur thil tha lo chu engmah ti suh. John Bosco-a chuan, “Thalaite awh duhna ber chu thatchhiatna thang hi a ni,” a ti a. Thatchhiatna lakah inveng flat la, ‘Ka peih lo,’ tih nei suh ang che. ‘I zuan hmam i zuanna tur en zet rawh,’ tih hi hriat reng tur a ni. Tihdam aiin inven a tha zawk si a. He kum thar hi mahni nun siam that nan, hmasawn nan, ‘mahni in re-treat’ nan i hmang ang hmiang.

4. **Sual lakah inthiarfihlim rawh** : Sual tinreng laka inthiarfihlim turin Pathian thu chuan min hrilh a, thupek a ni (I Thess. 5:22). Tihchhina tha lo ber chu sual tih chhin hi a ni. Chawhmeh tem chhin a ang lo. ‘Ti suh, ei suh, in suh, khawih suh,’ tih te hi tih chhin a that loh avanga thupek (order & warning) vek a ni. Mahni leh midang thatna tur pawh huam tela thupek hlu tak a ni a; zawm chu malsawmna, zawm loh chu anchhia – Eden huana Evi leh Adama te tluk anga tluk ve-na a ni. Zu, drugs, sex leh ruih theih thil dang laka kan inthiarfihlim theih phawt

chuan mahni kan inthunun thei tihna a ni a, khawpui latu aiin chutiang mi chu an ropui zawk. Mahni tana tha lo tur chu ti duh suh - bumna thang a ni.

5. **Taksa in Pathian chawimawi rawh** : Tunlai khawvel ngainatu Dema chanchin chu a chhe zawnga sawilan thin a nih laiin Daniela, Josepha, Mosia etc. chu entawn atan sawi lan an ni thin. Sadraka, Mesaka leh Abednegoa te anga Pathian tan nun hlan huamin, he kan taksa, mana lei hian Pathian i chawimawi ang u (I Kor. 6:19, 20). Kan taksa ngei hmanga Pathian rawngbawl hi amah kan chawimawina a ni si a, ‘Kan aw Amah fak nan, kan kut chak lo puih nan,’ tih kha i theihngihl suh ang u.

6. **Kohhran, ram leh hnam ro hlu i nih theihngihl suh** : Chhungkua, Kohhran, khawtlang, ram leh hnam nghahfak a ro hlu kan ni tih hi thalaite hian i theihngihl suh ang u. J. Edgar Hoover-a pawhin, “Thalaite hi a thlawna hnamin a neih ro hlu berte an ni,” a ti. Kan ram leh hnam, kan chhungkua, Kohhran leh khawtlang nun tinuamtu tur, a chhe lai siamthatu, thil tha lo siamthaa, kawng dik kawhmuhtu kan nih hi hre rengin thil tha tia entawna

insiamin hma i sawn zel ang u.

7. **Entawntlâk nun** : Khawii hmunah pawh, engtik lai pawhin sakhaw mi dik tak, Pathian ñih mi, tihtakzeta Pathian chawimawi leh be ñhin hmuh tur an awm zel. Pathian ñih mi, mi dik leh rinawm chu miin a rûkin an zah a, an entawn reng. Ei leh in, zuk leh hmuam, silh leh fen - leh nun dan phungah te 'min entawn rawh u' tih nuna nung ñhalaite zingah engzat tak awm ang maw! Kan hna thawhna ñheuhah entawn tur show thei ila, mawhphurhna leh tih tur tuk leh pêk ñha taka tih piah lamah rawngbawl na a nih hriain ke

pen leh hram thei ni phei ila, Krista inpêkna rim a nam lehzual dawn a ni.

Chutichuan, kum 2012 kan lo thlen hian he kum hian engnge a rawn her chhuahpui dawn kan hre lo. Billy Graham-a chuan, "Hun lokal turin engnge a kaw l hre lo mah ila, hun lokal tur chu Pathianin a kaw l tih ka hria," tiin Pathian kutah a innghat tawp mai. Keini pawhin kumin hian engnge kan tawng dawn kan sawi thei lo. Davidan, "Pathian kutah tlu lut phawt mai ila.." a tih ang khan a hnenah i inhlan thar zel ang u.

'Dam chung mi hmuak apiang, I tirh ni se,'



### KTP GENERAL CONFERENCE-A MIKHUAL LO KAL TURTE HRIATTUR

1. Conference chung hian Thenzawl ala vawh dawn avangin puanthuah rawn ken vek ni se.
2. Mikhual sem a awlsam zawk nan mikhual lokalte hming list copy 2 (hnih) ñheuh rawn ken ni se. (Main Counter-a dah tur leh mahni thlenna tur counter-a dah tur)
3. Mikhual lokal turte zan dar 10-ah chuan Thenzawl rawn thlen hman vek ni se. Mahni hmun a ñanga rawn chhuak hma tur leh kawng laka rawn khawmuang lo turin kan inbeisei a ni.
4. Mikhual lokal ten mahni chhungkhat laina te pan lo hram se. Mikhual semtu ten an semna hmunah thlen vek ni se.
5. Thenzawl khua hi hmun rem tak a nih avangin len vahna tur a tam hle a, mikhual lokalte inkhawm lai leh fellowship lai chuan tumah hmun dangah len vah loh ni se.

R. Thangdingliana, Secretary, Information & Publicity Sub.Committee

# WORK CAMP REPORT

— Lalmuanpuia Sailo,  
Secretary, Tuikhuahtlang Br.

**R**um 2011-a KṚP Tuikhuahtlang Branch-ten Branch Project pathum kan neih zinga pakhat 'Ramthar Field-a rawngbawl na neih' kan tihhlawhtlin dan han tarlang ve ila. September 28 — October 6, 2011 chhungkhan Tuidu, Tripura Mission Field leh Sib-Tilla, Barak Area-ah te kal chhuakin rawngbawl na kan nei a. Tuidu-ah hian Tripura South Presbytery Inkhawmpui Palaite tan eirawngbawl hna ni 4 chhung kan thawk a. Chumi hnuah Sib-Tilla, Barak Area-a Biak In thar sak mekah rawng hnawih hna ni 1 kan thawk leh a ni.

Ruahman lawk angin, September 28, (Nilai) zan dar 9:00-ah Upa P.C. Ramengzauva, Kohhran Committee aiawh chuan ṭawngṭainaa min thlah hnuin Tuikhuahtlang kan chhuahsan a. Rawng kan bawl na hmun tur hmasa zawk Tuidu, Tripura chu a tuk ni 29 (Ningani) chawhnu herah tluang takin kan thleng a. Work Camp-a kalte hi kan vaiin mi 26,

mipa 20 leh hmeichhia 6 kan ni. Kan zingah KṚP member ni lo, kan Kohhran Tual Upa C. Lalngaizuala a tel baw k a, kan phuisui phah hle.

**Rawngbawl na hmasa zawk - Tuidu:** Tuidu Pastor Bial chhungah hian Kohhran 22 awmin, Tuidu Kohhran hi Pastor ṭhuthmun a ni a. Tuidu Kohhran bikah hian member 352, chhungkaw 75, dan zawhkim 245 leh Kohhran Upa 3 an awm mek a ni. Rawngbawl tura kan kal chhan ber hi Tuidu Kohhran hian Tripura South Presbytery Inkhawmpui wawi 4-na, September 30 — October 2, 2011 chhunga neih chu an thleng a, chuta Presbytery Palai mi 915 baw r vel tan chuan ei rawngbawl hna kan thawk a ni.

Sept. ni 30 (Zirtawpni) aṭangan eirawngbawl hna chu Calvary High School Boys Hostel-ah kan thawk ṭan ta a. Hemi hmunah vek hian mipa leh hmeichhia room hranah kan riak nghal a. Tin, a kawtzawl nuam takah chuan inkhawmpui palaite tan chaw ei tur kan buatsaih nghal ṭhin a. Eirawngbawl nan hian gas a harsat avangin thing hmangin in chhungah leh pawnah thuk siamin rawng kan bawl a. Chawchhum hna kan buaipui ber a, KṚP member zingah vantlang ruai buatsaih nikhuua

chawchhum hotu ber leh kum engemaw zat chaw bel lo vil hmin tawhte kan awm nawk avangin kan huphurh lo ve hle a. Tuidu khaw lum tak hnuaiyah pawh thukah mei mit hman miah lovin, chaw bel kan chhuang kai chhunzawm char char thei a. Mei vil taima tak te, chaw bel vil hneh em em mai te, buhfai chhum tur zat teh thiam tak leh silfai thiam takte kan ni nawk hlawm a, kan âwl hman lo tluk a ni.

Khawlum leh meilum hmachhawn reng kan nih avangin mipaho chuan tawnzau hain gamchha (vaipuannem) chu kan pai far mai a, thlantui hruk a bang thei lo a ni ber mai. Kan nulate pawh gamchha nen thleng sil leh chawhmeh chan ilo fahran buaipuiin an kut a âwl thei bik lo va. Hun awl kar lakah tu leh faten an la en ve duh takin tih thua camera hmaah kan in-post zauh zauh a lo ÷ul bawksi, hahtlak leh lum pawh sawi phal lovin kan hlim tlang hle ÷hin a ni. Tichuan, ni thum chhunga Presbytery Palaite tana chaw kan chhum zat chu buhfai no 3950 a ni a. Vanneihthlak takin chaw chhum hmin loh kan nei lo a, a eitute pawhin tui an ti ÷hin hle a, kan lawm ve em em a ni.

Keinin chaw chhum hna kan lo buaipui lai hian

chawhmeh leh ÷ul dangte chu a ram mi, mipa 10 bawr velin an lo buaipui ve char char a, an chawhmeh duh tlan ber pakhat 'bodok' (keinin 'vaipaden' kan tih ang hi) hi an siam tel reng bawka. Chawhmehah chi dang chu a tlangpuiin — dal chhum hân, vawksa leh alu kan pawlh, maipawl leh dil sangha man thar kanro te kan siam ÷hin a. Sangha hi Pastor Quarter kawm-thlangah Kohhranin dil an nei a, chuta mi chu an va man leh mai ÷hin. Chaw ei siam peih fel a nih hnu hian Palaite chu an thlen in a÷ang leh Biak In a÷angtein inkhawm ban hnuah te an lo kal khawm mai ÷hin a. Kum dangah pawh Inkhawmpui Palaite an lo thlen tawh ÷hin angin thlen in chu an siamsak veka, amaherawhchu thlen inah chaw ei lovin a thlengtu Kohhranten a huhovin chaw ei tur an buatsaihsak ÷hin a ni.

Keinin chaw kan chhum bakah hian zing leh tlaiah chaw eina tur counter 4 siamin kan vil leh char char a, an ei fel zawha thlengte kan silfai hnuah a tuk zing atan chaw leh chawhmeh turte siam lawkin zan dar 11 thlengtein kan inpui tlang dial dial ÷hin a ni. Tichuan, Presbytery ÷iak tuk Oct. ni 3 (Thawhtanni) chuan zingkara haw hman lo, palai mi 600 bawr vel tan tuk÷huan kan buatsaihsak leh a,



chumi zawh hnu chuan Tuidu-a kan rawngbawl na chu kan thawk zo ta a ni.

Tuidu-ah hian eirawngbawl tura kan kal mai piah lamah kan phak ang taw k thilpek kan keng tel baw k a. Tuidu Pastor Bial chhunga Kohhran hrang hrangte tan Khuangtê 11 kan keng a. Hei hi Kohhran miten khuangtê pakhat man Rs. 2,000/- zel an thawhkhawm a tanga lei a ni. Tin, Branch hmingin Tuidu Kohhran tan Sound Box lian pakhat leh Tuidu Pastor Bial chhunga Evangelist-te hman turin Guitar pakhat kan kente chu Bialtu Pastor hnenah hlan a ni.

***Agartala leh Sib-Tilla zinkawng:***

Oct. 3, 2011 (Thawhtanni) tukthuan ei khamah Tuidu chhuahtsanin, Agartala kan pan a. Tripura Field Secretary-in phal takin Mission Compound-ah min thlentir a, a chungah kan lawm takzet a ni. Agartala-a zan khat kan riah hnuin a tuk ni 4, (Thawhlejni) zingah Sib-Tilla lam panin kan chhuak leh ta a. Sib-Tilla kan thlen hmain Silchar-ah Durga Pooja avangin kan tlang thei ta lo va, khua a thim zui ta baw k nen, Silchar khawchhungah lirthei kal tlang theih a nih tawh loh avangin Silchar khawlai tawt leh bengchheng tak karah kan tlaivar dawn ta mai emaw kan

tih laiin, kan hruaitu thenkhatten rilru tawngtaina nen traffic police duty-te an han dawr a. Vanneihthlak takin Silchar-a Mizoram House kan thlen phei chu min phalsak ta hram a, kan thaw a veng hawk mai. Pathian min hruaina ropui tak kan dawng a, kan lawm tlang hle a ni.

Silchar Mizoram House-a zan khat kan riah hnu chuan a tuk Oct. 5 (Nilaini) zingah Sib-Tilla panin kan chhuak leh ta a. Silchar khawchhung kan chhuahtsan hmain kan motor ke a chhe ta hlauh mai a, mahse kan chhiatna hmun chu workshop kawt zawn chiah a lo ni a, a mak danglam hle. Kha chen rim takin kilometre engemaw zat kan tlan tawh a, siamthat a ngaih hunah tak workshop kawt a chhe ta a nih chu! Kan Pathian hian a mite tan remruat dan a lo va thiam thin em! Tichuan, kan motor ke chhia siamthat nana darkar 2½ zethun kan hman hnu chuan Sib-Tilla, Barak Area chu kan pan leh ta a, tlang takin chhun dar 12:00-ah kan thleng ta a ni.

***Rawngbawl thawh 2-na Sib-Tilla-ah :*** Sib-Tilla-ah hian kum 2001 a tanga khan Tuikhuahtlang Kohhran hian Ramthar Committee hmalaknain rawngbawl hna a lo thawk tan tawh a. Tun

thleng hian Sib-Tilla chu Tuikhuahtlang Kohhran Ramthar Field pawimawh ber pakhat leh hmalak mekna hmun a ni. Tun tuma Sib-Tilla kan tlawh chhan ber pawh hi Ramthar Committee hmalaknain Biak In thar sak mek a ni a, hnathawh tur hmabak la awm thawk tura kal kan ni. Tunah hian luah theiha peih fel tep tawh a ni nghe nghe.

Sib-Tilla hi Pailapool Pastor Bial chhunga awm a ni a, rawngbawltu Kros Sipai 2 leh Evangelist 2 (nupa) an awm mek a. Kristian hi chhungkaw 20 vel an ni a, active member erawh an tam lo hle thung. Chutih rual chuan ringtharte hian Biak In thara inkhawm hlan hi an nghakhlelh tawh hle a, hun reiloteah peihfel a nih hun chuan ringthar pawh an awm belh zel ang tih rinna leh beiseina lian tak kan nei tlat a ni.

Sib-Tilla-a Biak In hi kawngpui bul lawka awm a ni a, a sir tuak leh a hnung lam chu phaizawl buh hmun mawi takin a hual a, a awmna hmun pawh

duhthusama rem a ni. Tichuan, chawhnu herah khaw lum leh ni sa vel vawl a ziaawm tak hnu chuan Biak In bang chhung leh pawn cement plaster zawh tawh, rawng (primer) hnawih hna chu mipahovin kan thawk a, hmeichhehovin thutthleng nawh mam hna an lo thawk ve bawka. Kan thiam ang tawka ulukin kan thawk theuh a, tlai lam unau hmehlai awm vel hun thleng kan thawk a, kan thawk zo hman ta hram a ni. Sib-Tilla-ah chuan zan khat chiah kan riah hnuin a tuk Oct. 6 (Ningani) zingah Mizoram lam panin kan chhuak leh ta a, tuang takin tlai dar 5:00-ah Aizawl kan thleng leh ta a ni.

A tawp berah chuan Ramthar Field-a rawngbawlina tur kan ruahman lawk zawng zawngte a hun tak zela min tihhlawhtlintir a, min kaihruaitu Pathian hnenah lawmthu kan sawia. KTP ten kan phak tawka rawng kan bawlina zawng zawngah Lalpa'n ropuina chang zel rawh se tih hi kan tawngtaina a ni ♦



## KRISTIAN THALAI HRIATTIRNA

**Kristian Thalai hi Calendar Year zuia kal kan nih angin January thla hi Kristian Thalai kum bul intanna a ni a, January atanga lak zat tur in report lote chu nikum (2011)-a an lak zat kan thawn a, lak belh dah chuan Office-ah hriattir ni se. (1 lakna man hi kum khatah ₹ 50/- (sawngga) a ni a, Branch tinin a rang lama pe theuh turin kan inngen a ni.**

— Editorial Board

## KṚP General Conference tawp tawh tur hi ka ui

— Lalchuangkima Tochwawng  
Diakkawn, Kolasib

**A**mak ka ti, Mizoram Synod pawh hi kan khawvel hi thalaite khawvel a ni tih thu sawi uar lai laia, a tiṭhuanawp zawnga rorel hi dik ka ti thei lo. Tun aia tama thalaite kawng engkima kan inhman dan tur ngaihtuah chhuah ahnêka hmanlai rilru la put tlat mai chu(h). Kohhran thu hi Pathian thu a ni tih kan lo sawi ve zawng zawng pawh kha kan lo ti sual ta hialin ka hre ta mai. Anni chang an ni lo, kan hruaitu hmasa leh tun thlenga Central KṚP hruaitute pawh an ti mak reng reng, hei aia ram pum huap KṚP member intawhkhawmna hi siam chhuah leh ngaihna a awm thei tawh lo vang, awm mah se hei ai chuan kan hlut tawh chuang lo vang. Chhût let ve mah teh, khawvel ram dangah thalai rual hetiang an vang tawh an tih mek lai leh, ram pawn palaite nen meuh kan intlawhpawh tawn tawh hnua tawp mai tur hi kei chu ka ui thlawt a ni. Engtik lai rorelah nge maw an lo pass reng reng ni? KṚP hi tawp mai tur ang hialin ka ngai a, heng thil ka chhût lêt hian tawp atan chuan ka ui êm a ni.

Zah vanga sen sa vût khawpa fellowship-na hmuna rawlthar khawiah mah mi mala la zai ngai lo, zaipawlah pawh a hnung lam leh mi kar chuh thin, tingtang lah D key hmet thiam ngawr ngawr min zaitir ngawt tuma zai dik thei lo, key dik thei bawk lo, zah lutuk avanga zai zo thei lo hiala hmai mai ni lo, beng nen lama a sat vut tum kha kum 20 chuang lai a liam ve ta reng mai. 'Ka fellowship tawh ngai lo vang,' tih rilru ka put hial laia zak hauh lo tur leh a aia tha zawka ti thei tura tang sauh tura min fuihtu kan hruaitute avanga KṚP thiltih leh Zaipawl nuam ti taka ka tel ve tâk zel kha a lo va inchhirawm loh; lo tawpsan ta ila kawmkara chhar vel mai mai tur kan ni lek awm si a.

Sum tuak tul miao hek, hruaitute'n zan len den an rawt mauh mai si. Rawlthar len deng thiam bawk si lo, kal ve a tul miao si a. Sum tuak tur chauh kan ni bawka, khawnvartui emaw, diesil emaw lei tamna tur pawisa awm miao hek lo le. Lui kan han thleng a, zana chhit tur mau ro kan pu khawm a, meichher eng emaw zatah kan chhuaha zanriah hmeh tur sangha tlem man mai lai kha chuan a la nuam viau, khua a rawn thim tan a meichher tel khawm pu tur kha chuan len deng thiam lo a ngai tlat si a, thim hnuaiah lui dung thim ruih mai, lung nal bawk sia tluk palh hlauha a pawl theih dan tur hre ran chung a lui kawi

eng emaw zat meichher tur put kha chu 'min chhawk tur an awm dahlawm maw...' tia hawi ruai mai kha awl tak chu a ni. Len den thiam loh pawizia inhmuhchhuah nan tha tak a ni, inhlanna siamin input chhawk tur ni ta se, kan inhlannang ngawt ta ve ang. Rawngbawl naah hi chuan a nuam lai ai chuan a hrehawm lai tak hi a hnua min tilawmtu a ni hlauh si; KTP vang a nih pheichuan...

Tlangval ve ta chu *luck* deuh ang ziazangin thiante bula nula rimte pawh kan duh ve a, mahse, KTP tan inkhawm thulh thiangek lo le, inkhawm loa thiante nula rimna hmuna kal ve mai leh an tih ang apiang tih ve mai kha chakawm thin tak chu a ni. Tute emaw sermon tui em em laite khan tute thingpui tuzia emawte kha biakin chhungah kan lo hisap thung a, a rau lo hle thin mai. Inkhawm ban veleh ngamlak inah emaw, mahni inah emaw Bible leh hla bu kan han theh lut rawk a, hmanhmawh fahrana nula rim tura han kal hlawk hlawk mai hun laite kha rei deuh a ni ve tawh. Tlangval tan chuan Pathian thutak han luh chilha tui taka han sawi chang te chu awm ve thin mah se, harsa tak a ni ve a nia. Mahse, inbual leh inkhawm inchhir an awm ngai si lo, lo ti hram zel ta lo ila...

Mi hmuh ang te kan hmu ve ta a, chhangchhiat vanglai takin fate zun hing em pawh nupuite

tihfaipui hman mang lovin zingkar hnatlang tih loh leh Inrinni hnatlang, sawrkar chawlh hlek lah kan hre ran a, KTP tan engtin nge kan lo hman tanglek ang tih ringawt kan ngaihtuah rawl nen. Zan lamah hla zir, committee, inkhawm banah te nen lam pawh committee member thutful a la awm cheu. Zan khat pheichu buai vanglai deuhin kan chhuak zing deuh a ni mai thei, ka chhuah loh tur thu fate bulah ka sawi a, ka fapa-in, 'Engati nge?' a ti; chhuah loh an hre thiam lo hial ni tur a ni. Pahmei berin nupui fanau pawh uap lum tha hman lo lekin kan awm a, heng hunah mawlh hian rawngbawl na mah ni se, in lam haw hi pa ber pawh kan inthlahrung rum thin. MAHSE, nulatu hre teh u, hetiang huna Pa tana ngaihnaawm leh hlu chu 'chhuak chhuak rawh, in lamte chu kan lo buaipui thei alawm' tih thu te mai hi. Patling, rawng-bawl na kawnga thui tak pen thin phenah khan an nupuite an awm, fak an phu ngawih ngawih. Eng pawh ni se, KTP vang a nih phawt chuan pen chhuak tura min titu hian min theihngihl hauh lo vang.

'A pa chu KTP a nia.' He thu hi a tawi viau na a, insit tak chungin ka hlut khawp nia. Ka fanu tawng theih tirhin 'Tu nge i pa,' tiin an zawt a, ka fanu chhanna a ni. Mi inpekna thlirin a zahthlak hle chuan ka hria a, min hre Chiangtute an nui mai ang tih a hlauhawm hle

na a; mahse, KṚP hming tal kan lo lam zing pawh a ni mahna le; kan pen chhuah tlem tehlu nen rawngbawlpuite thlazar hnuaiyah kan lo phe ve mai mai a ni lek si a. Tun hnu hian, 'Aw, khami ṭum khan ka lo ti lo a ni' tih ka ngah hle mai. Malsawmna min petu a ropui tehlu nen, a bul aṭanga han ṭan leh theih ka va chak tehlu êm! 'Áu chu KṚP a nia' an tih turin. Mahse, a ṭlai tawh, General Conference hial a tawp tawh dawn si.

'KṚP chhiat ai chuan ka chhia a ni mai' tih te kha kan sawi ve baw k a, Krawsa kan tana tuartu tawrhna thlir chuan he khawvela ringtutena kan thil tawnte hi chu sawi ngam tur kan ni lo. Ringtu nun chu Amah avanga tawrh pun leh chan pun a ni miau si a. KṚP-ah hian hlimna lam hlir a inbil lo va, tih hram hram nunin a zam chuat a ni. Chutah chuan nuam tiin hrehawm tuar belh zel pawh tum ila, theih loh tawp chin a nei.

KṚP avanga Pathianin min hruai dan leh malsawmna ka dawn zozai hi sawi fiah thiam chi a ni lo. Khawvela ka hlim ni ber ka tawng a, Amah hi fak mai tur ka ni. MAHSE, a va mak ṭhin êm hringnun hi.

Tunah chuan General Conference-a kal ve zel pawh tumila, KṚP ang chuan an phal tawh lo, ka tan a tawp tawh. Nikum hmasa (2010) khan KṚP aṭanga thlahna thuziak ka dawng

tawh a, tel reng a rem lo. Zep nâk emaw, mi min thlah tawh hnuah pawh ka ui emavangin ka kalsan thei ngang si lo. Tun thleng pawh hian bengah leh mitthlaaha cham reng mai si a... mahse, tunah chuan Dt. 13.10.1970-a piang tan chuan hun bithliah kan pelchiang ta, ka va ui êm.

Hetih meklai hian KṚP huang chungha ka awm laia mi rilru ka tihnat zawng zawngte kha ngaihdam dil dawn ila ka dil seng awm tawp si lo. Hun bi awma siam pawh hi a lo va han ṭha leh si êm. Synod leh CKṚP hruaitute pawh ka dem ta lo, fate pawh KṚP rual an ni hnai ve ta, ṭhalai tih kan pel a, Sapin nun bul an ṭan an tih kum (life begins at 40) kan thleng ve leh chiaha, tel ve reng ta ila, 'hmana mi kha maw?' min ti hial awm si a.

KṚP member ni mekte u, ka va awt che u êm. Inchhuang ula, hlim ula, he khawvel hi thlir ula, a rawngbawlp turin ṭang sauh rawh u. Keini tan chuan General Conference meuh pawh a tawp tawh asin. Conference hnuhnung ber (2010) Mamit-ah kha chuan neitu rilru puin phur takin kan la kal ve thei a, Thenzawlah hi chuan kal ve mah ila chhimtu kan ni tawh ang, a va mak dawn êm! Insum zo ngang lova, ka lo kal ve a nih pawhin min lo hre thiam hram ang che u, tawp mai tur atan chuan ka ui êm a ni. Ṭhalai sing rual, Pathian faka han zai dup dup mai...Aw, ka sawi thui leh dawn, a rem ve tawh lo ♦

## 54<sup>th</sup> KṚP GENERAL CONFERENCE 2012 thleng turin

### Thenzawl khua a inbuatsaih zel

— Upa P.C. Lalropuia, Secretary  
Organising Committee

**5**rd KṚP General Conference, 2010 rorel palaiten duhsak taka "54th KṚP General Conference, 2012 chu Thenzawl khuaah nghah ni rawh se" an lo tih chu lawm taka pawmin hma lakngal a ni a. Thenzawl khaw chhunga Pastor Bial hnih (2) Standing Committee leh Bial KṚP pahnih Joint Meeting chuan 54th KṚP General Conference Organising Committee chu April 10, 2010 khan a dinfel a. Organising Committee chuan a theih tawka chakin hma a la zui ta char char a.

**1. Organising Committee hma laknate :** Organising Committee din a nih aṅanga vawiin ni thlengin vawi 31 zet meeting chi hrang hrang neih a ni tawh a. Bialtu MLA, Chief Minister leh kan Patron member ni bawh hovin vawi 3 ṭhut a ni tawh bawh a. Kan Chief Minister zahawm tak leh kan Patron member ni bawh - Pu Lal Thanhawla leh a Cabinet ten kawng engkimah hma min lakpuin min phurpui hle a, kan lawm tak zet a ni.

Organising Committee hian Sub-Committee 13 siamin Gen-

eral Conference thlen nan sum hman tur cheng nuai 30 a ruahman a. Chubakah, General Conference kan thlen tur denchhen hian khawtlang hmasawna (development) kan sorkarah beisei kan nei nual a. Hmasawna kan beiseite zingah eng emaw zat tih hlawhtlin ni tawhin eng emaw zat chu tih hlawhtlin tura chhawp mek an ni bawh. Heng hmasawna kan beisei tih hlawhtlin kawngah hian Bialtu MLA a fakawm hle. Organising Committee hian mikhual mi 25000 (singhnih sangnga) aṅanga 30000 (singthum) zet lokal turin a beisei a. Hetih lai hian Security Sub-Committee te erawh khauh deuh ṅeng ṅawnga chet an tum a. Conference Palai lokal turte pawh infuih ṭhat deuh a ṭul ngei ang.

Prayer & Evangelism Sub-Committee ten Synod Revival Team tu emaw ruaiin palai lokal buaipui ngaite an awm chuan Counseling Class pe turin a inbuatsaih mek bawh a ni.

Information & Publicity Sub-Committee lamin Thenzawl khua Documentary

Film tichhuak turin hma an la mek a; General Conference denchhenin Calendar an buatsaih a, zawrh chhuah mek a ni bawk.

Reception & Ushering Sub-Committee lam ten Pastor Bial hrang hrangte thlenna tur counter an siam peih tawh a (December Issue Kristian Thalaiah tarlan ani), mikhualte rual thei ang bera sem an tum.

Refreshment Sub-Committee lamin General Conference chhungin thingpui leh a hmeh tui tak wawi 3, palaite min pek an tum a; thingpui hi minute 15-20 vel chhunga sem zo hman zel turin an inbuatsaih bawk.

Traffic Sub-Committee lamin General Conference chhunga Traffic Rule mumal tak tur siamin Motor Park-na tur hmun thum vel an ruahman bawk.

Sub-Committee dangte pawhin an hmalakna turah theihtawp chhuahin hma an la mek hlawm a, an buaiin an hmanhlel hlawm hle a ni.

**2. Thenzawl khaw chanchin tlangpui :** KTP General Conference nghahna hmun Thenzawl khua hi Sailam Lal, Bengkhuai (Mary Winchester mantu) khaw per a ni thin a. 1875-ah thli chhiain a khua, Sailam a nuai chiam a; 1876 khan Thenzawl khua thutin 1876 - 1879 (kum 4) chhungro a rel a. 1879 khan kum

50 mi vel lek niin a thi a, Thenzawlah phum a ni.

Thenzawl khaw bawh zau zawng hi 7 KM bial vel nia chhut a ni a; Latitude 23.50 N leh Longitude 92.40 E inkara awmin Tropic of Cancer ngaihruat rin in a paltlang nia sawi a ni. Sik leh sa thua pawh a hawi lam a chiang law law tih thin a ni. Sea level a tanga chhutin 2463 ft a sanga awm a ni. General Conference neih hun tur - March thlaah hian chhun lamah khua a lum tan tawh dawn a, zan lamah erawh khua a la vawt fu dawn a. Palai lokal turte pawh in thawmhnaw lum lam ken a paw lovang a, mutbu pawh ken uar a tul hmel hle.

2011 chhiarpuih khan Thenzawl khuaah chenna in 1450 awmin mihring 7000 khawsa a chhut a ni a. Hetah hian Govt. building 120 vel chhiar tela ni lo. Tunah hian chenna in 1500 vel awmin, mihring 7500 vel awma chhut a ni.

**3. Thenzawl ram chung a thil awmte :** Thenzawl ram chungah hian khualzinte hiptu hmun pawimawh tak tak (Historical monuments) a awm nual a; chungte chu -

(i) *Vaibiak Lui* : He Lui hi Thenzawl thlanmual piah lawka awm a ni a. Helai hmunah hian Mary Winchester (Zoluti) la let turin Lt. Col. LH

Lewin (Thangluaha) leh Bengkhuaia upa min Dokaia te'n 'inremna saui' an tan a, hming an ziahnhan a ni. Tunah helai hmunah hian hriatrengha lung ða takin a la ding a, khualzinte en theih turin chei ðat a ni.

(ii) *Bengkhuaia Thlan* : Ban pil vela sang, Bengkhuaia thlan hi Thenzawl khaw hlui (Vengthar chhakah) a ding luah ðhin a; tunah erawh chuan a thlan hi a thlusaawp tawh a; a hmun hma erawh en duhte tan en theih turin chei thar ðat a ni.

(iii) *Tualvungi Thlan* : Vachadil nula hmelðha, Tualvungi thlan hi Lunglei Road, NEC phei, kawngpui bul hnaiah a awm a. A thlan lung hi lian lo tea phun a ni a. Abul velah hian thing hniam te te, ðawi lii liai a ding ðhiau ðhin a, a lunglen thlak hle.

(iv) *Chawngchilhi Pûk* : Vantawngkhawhthla peng aþanga 1 KM vela hla, Lunglei kawng chungah pûk mawi leh nuam tak mai a awm a, chu chu Chawngchilhi puk an ti a. Mizo thawnthu-a Chawngchilhi kha ni tak maw?

(v) *Vantawngkhawhthla* : Thenzawl khua aþanga Lunglei kawng 6 KM vela hla, khawchhak lamah pengin, peng aþanga 3 KM vel zeta hlaah a awm a. Vantawngkhawhthla hi Vanva Lui siam a ni a. A

khawhthlasan zawng hi 750 ft a niin Mizoram tui khawhthla sangber a ni. A panna kawng hi Black topped niin a enna (view point) pawh ða taka siam a ni bawh.

Heng bakah hian nula leh tlangvalte han len kual vel nana ða fahran park mawi leh nuam tak, swimming pool te awmna 'Thenzawl Park' Thenzawl aþanga hla lote, Lunglei kawng (NEC) ram bulah a la awm ta cheu a. NEC ram chhak tlangdung zal nuam takah Cowboy-te tuallenna hmun a la awm zui; a va mak leh zel ve i ti mai thei. AH & Vety Deptt. lamin sakawr leh Cowboy rual, General Conference chhung hian dah an tum a ni awm lehngal e!

Inbiakpawhna lamah chuan BSNL, Airtel leh Reliance Company te'n Tower an nei a, network pawh a ða tlangpui. Palai lokal turte pawhin hei hi hriat a ða ang.

**4. General Conference hunah lokal ve ngei ang che aw :** Khawpui ðhang mek, hmun zawl leh rem nuam tak, Mizoram laili, thuthlung fa intite phei chuan 'Ramlai Malsawmna' dawng tura an ngaih, Ayush Damdawi In sak ðanna leh sorkar in NIT an dahna hmun Thenzawl khuaah hian KÏP General Conference wawi 54-na, March 1-4, 2012 hmang turin Mizoram chhung leh pawna Bial





## Eizawna kawng inkawhnmuhna

— Dr. Malsawmliana,  
Vaivakawn Branch

**R**an ram dinhmun en hian zirlaite leh thalaite zingah Career Awareness lam kan hawi loh chuan kan ram hmabak hi a eng lo mai thei. Engvangin nge kan thalaite zingah hnathawh tur mumal nei lo an kat tãk nuk mai? Chhanna tam tak a awm thei ngei ang. Thalaite leh zirlaite hnenah an hmakhua inkawhnmuhna tha kan pek loh chuan a tawpah beidawna mai an paw chhuaklovang tih a sawi theihloh. Lehkathiam si, eizawna nei lem lova tei ta mai mai, a tawpah nun beidawna avanga mahni intihrehawmna hial thlen te pawh awm theih a ni. Chuvangin hemi kawngah hian Kristian Thalaite hian ke kan pen a thul khawp mai.

Tun thleng hian zirlaite zingah tum mumal nei rana lehkha zir hi kan tam lo hle mai a, BA/MA zirlaite zingah pawh a ni tho. Hemi a nih avang hian zirna lama kan kal chhoh zelnaah rualelna kan neih tawk loh phah thìn a, chu chuan hna zawna thleng a nghawng

chho ta a ni. Mizote zingah hian 'hna' kan tih hi 'Sawrkar hna' ni bik tlata hriatna hi a awm tlat a, hei hian min tibuai thìn. Chuvangin hna zawna kawngah pawh tam tak chuan Sawrkar hna a nih loh chuan dil kan tum lova, kan hmu a nih pawhin hna dang zawn pahin kan thawk vel mai mai thìn. Hemi chungchangah hian sawi tur tam tak a awm thei ang.

Hna dil tur chungchangah pawh inkawhnmuh kan ngai hle a, hriat loh avanga dil loh pawh hi kan ngah viau awm e. Tunhnaiah Mizorama Staff Selection Commission(SSC) hotu lian pakhat rawn kal chuan SSC-ah hian Mizoram atanga dil an tlem thìn thu a sawi. Dil an tlem chuan hna hmu pawh tlem te an ni dawn tih a ni a. Mizoram atanga dil an tlem thinnha chhan nia lang chu inkawhnmuhna kan neih that tawk loh vang a ni. SSC hian Central sawrkar hnuai hna hrang hrang (Group A hnuai lam )an khawih a, kumtinin engemaw zat an la thar reng thìn. SSC ah hian a nawlpui tan hna a tam a, pawl 12 leh BA pass chin tan ringawt pawh hna a tam khawp mai. Entirnan, Combined Higher Secondary Level Exam, Combined Graduate Level Exam, Data Entry Operator etc. Heng hna hrang hrangte hi ST

quota engemaw zat a awm thin a, Mizote hian hmang tangkai thiam ila a va tha dawn em! Kan rilru in Mizoram chhung chauh tin zawn lo ila, kan khaw hawi te pawh kan tih zauh a tul hle mai.

Tunhnaiah Indian Army, Navy leh Air Force ah officer lut an tlem tak avangin thuneitu lam ten hlawh an tisang a. Hei hi mi thiam tak takin Sipai Officer an nih chakna tura an tawktarh a ni. Mizote zingah ngei pawh sipai officer a lut hi kan tlem ta hle a, eng nge a chhan ni ang. A chhan pakhat ni thei awm chu written test vang hi a ni awm e. Written Test-a tling tur chuan inzir nasat a ngai a, inchhunga inkhunga a ngai a, chu tak chu kan peih loh thin chu a ni. Khawlai nuam kan ti a, hla zir, hnatlang, khawhar in kal, inkhawm te a lo ngai thin bawk nen, zirna lam kan ngaihthah phah thin. Hetiang dinhmun kan nih avang hian Sipai Officer a lut duh tan chuan HSS leh College kal laia NCC zawm hi a fuh khawp mai. NCC 'C' Certificate nei tan chuan Exam buai a ngai lo. Sipai Officer lakna tura exam buatsaihah hian (UPSC exam telin) 'C' Certificate nei chu exam kher a ngai lova, interview tura koh nghal an ni thin. Tin, kumtin hian hetiang post ah hian 'C' certificate nei

tan post 100 vel hi reserve thin a ni bawk. Mizote zingah pawh NCC hmang tangkai tak tak hi an thahnem tawh hle a ni. Chuvangin zirlai tan chuan NCC lama tel hi hnazawanna nen a inkawp avangin a fuh khawp ang.

Kan changkang zel a, kan in leh lo enkawl dan pawh a changkang chho ve ta zel a, Aizawl khawpui chhungah ngei pawh In tha tak tak, sap ram In ang mai hi a ther fur tawh a. In chhung ropui tak tak leh changkang tak tak pawh a tam ta. Heng kan In chhung cheimawi tur hian Mizo zingah hetiang lama mithiam, Interior designer kan la nei tam lo hle a. Tuna han hausa deuh leh In tha tak tak nei hi chuan Interior Designer te hi an inchhung chei turin an rawn tawh a, ram a thang zel anga kan la mamawh chho zel ang. Chuvangin hetiang lama thiamna nei hi Mizote zingah kan mamawh tulh tulh dawn. Chuvangin Interior Designing zirna lamah hian thalaiten ngaihtuahna kan sen a ngai.

Thiamna sang neih kawngah pawh tan kan lak a ngai hle mai. Tunhnaiah Doctorate hmu thar engemaw zat kan nei a, a lawmawm khawp mai. University te hial

kan neih tawh avangin thiamna sang tak tak neih leh mi la zir loh lam te hi kan zir a, kan ngaihven a tul tawh a. University hna laknaah an duh ang thiamna Mizo zingah nei kan awm thin loh avanga loh theih lohva hnamdang lak a ngaih chang a tam ta mai. Entirnan, Mass Communication lam pawh kan uar, mahse PhD nei erawh kan la nei mang lo. Kumtinin Engineer zir turin thalai engemaw zat kan tir liam a, Mizoram quota chan loh hlauvin kan vir hut hut a. Kan zir chhuak a, BE ah kan tawp a, a aia sang zir tum leh Engineering lama Doctorate degree hial soal chhuak chu tunhnaiah kan nei ta mang lo. IIT te pawh kan nei, mahse zirtirtu atan hnamdang ho loh theihlohva an rawn luh a la ngai tlat. Chuvangin Mizo thalai lekhathiam te hian thiamna sang leh ril zawk neih kawngah hian tan kan lak a ngai khawp mai.

Tunlaiah phai lam atangin Hotel, Call Centre, Restaurant vela hnathawk tur Mizo thalai an duh thu kan hre fo thin a. Hetiang lakah hian kan fimkhur a tha hle. Kan rama hnathawh tur mai a awm loh avangin hetiang ang sawmna hi hnar har kan ti thin a, phai lamah kan zui

thla a, mi tam tak chu beidawngin an rawn haw leh thin. Tin, inbumna te a tel thin baw avang hian hriatchian loh chu hmun hla ah phe chuan bawh huam huam loh a fuh zawk. Thenkhat chu mipat hmeichhian lam kaih hnawih te a lo nih thin avangin nungchang thlengin an hlauh thei. Chuvangin hna kan zawna ah hian fimkhur ila, Kristianna nena inmil hna te pawh zawng thiam ila a tha khawp mai.

Kan ram than chhoh zel dan en mil hian eizawna bulanna tur hian a lo inbuatsaih theih. Entirnan, bawlhhlawh paih chungchang hi kan ramin a la buaipui dawn chauh a, Sawrkar pawh in hma a la chho zel baw a. Chuvangin nakin lawkah chuan Waste Management lama thiamna nei te hi kan la mamawh hle dawn a, a lo inbuatsaih chi viau ang. Nakin lawkah chuan kan la mamawh em em tur, tunah pawh kan mamawh chhoh tan mek chu Management lam thiam hi a ni. Private company leh Bussiness firm/Centre te a pung chho zel ang a, hetiang lama thiamna nei te hi kan mamawh tulh tulh ang. Tin, Hotel leh Restaurant changkang tak tak te pawh kan la nei zel ang a, chutih hunah chuan Hotel management lam

thiamna nei te an pawimawh ang. Lo inhmakhua te pawh a tha hle a ni. Tuna mi tam takin eizawwna kan neih ang chi te pawh hi tun aia changkang zawk leh awmze nei zawka kan her rem thiam te pawh a tha khawp mai. Entirnan, lu mehna dawr te pawh hi tun aia changkang deuh zawkin a siam theih. Tuna lu mehna dawr kan enkawl ang loh deuh hian fel fai leh thianghlim zawkin enkawl ila, lu suk fai nghalna tur tui nen inchhawp ta vek baw ila. Khawlaia len vah vel pah pawhin meh tir mai a awlsam ang. Tun dinhmunah hi chuan a hranpa a lumet tura inbuatsaih a ngai a. Len haw lamah emaw, len chhuah hma in emaw kan meh tir lo thei lova, a chhan chu meh zawhah mahni Ina haw a, lusuk phawt zel a ngaih thin vang a ni. Chutiang dawr chu ram dangah chuan an nei deuh vek tawh zawk a, kan ramah pawh hian kan tih ve a ngai tawh.

Eng pawh nise, eizawwna kawngah hian Kristian Thalaite hian khawhawh kan tih zauh atul a, kan state ringawt hi ngaihven lo ila, khawvel hmun dang te pawh kan melh a tul khawp mai. Tunlaiah Internet kan hmang nasa tawh a, thalaite zingah nasa takin hmun a khuar tawh a, Facebook te phe chu hre lo

kan tam tawh awm lo ve. A hranpa a Internet Connection nei kher lo pawhin Mobile Phone atangin a khawih theih vek tawh avangin khawpui leh thingtlang a dang chuang lo. Hetiang ang awlsamna te hi hna zawwna atana kan hman tangkai thiam chuan a hlu khawp ang. Internet te hi Facebook a thiante kawmna atan chauh hmang lovin hna zawwna atan te hmang ila, thil tangkaiah i hmang ang u. Tunlaiah phe chuan hna tam tak hi Online-a dil chi te a ni tawh a, a bikin Bank Exam phe chu 'Online Application' veka dil tur a ni tawh a. Hemi avanghian heng kan mobile phone te, internet te hi a tangkai hle a ni. KTP memberte hian kan mobile phone te hi hetiang zawng hian hman tangkai i tum ang u.

A pawimawh berah chuan hna zawn leh eizawwna kawng kan zawh mekah hian taimakna leh tumruhna a pawimawh ber a, 'teirei peih' a ngai. 'KTP active member ni chung a zirna kawnga hlawhtlin leh filawr nih hi thil theihloh a ni' ti a mi sawi thin hi a theih zia te pawh kan lantir a ngai a, chumi ti tur erawh chuan TV leh Computer Games, internet facebook vel buaipui mai mai lo deuh hian buaipui tur dik tak zawk hi i buaipui ang u ♦

## VAN ROELNA AH MIN TELH VE LO

— P. C. Vanneia,  
Venghlun, Chhingchhip

**S**eptember ni 3, 2011, (Inrinni) a ni a, Biak In leh a vel ti faiin KTP kan hnatlang a. Chawhnu lamah chuan ka nawm loh deuh avangin hnatlang ho chu tin sanin in lam panin ka haw chhat chhat a. Ka room ka thlen chuan mut hahdam pahin kan ral lawka Tawitlang lian lurh mai, mual kham pheii sei fahran, tlang awihpang leh khamrang ruai lam chu ka hawi a. Khawvel vir vel chu ka ngaihtuaha, tlang leh luite chena kan Pathian kut hnu leh a ram mi mil tawk zela leilung ruangam a remkhawmte chu ngaihtuah chungin lungleng takin ka thlir vawng vawng a. 'Khing khamrang te khi enga tana siam tak chu ni maw? Ram zawl kan neih tlem vei nen, leilet atan te ti zawl zawk se' ti a ka suangtuah lai chuan ka mitthla ah Sathar te nunchan zirlai an lo lang a. Phaizawl leh ngaw durpui kara an nun khua hlim zo ve lo te tualchaina, lam an lo thai ve paha lungbang al leh puk biru te chu an tan damkhaw-

chhuahna kulhbing a lo ni reng tak a. Partin zu lawra mualtin fanga awmni reng kham hman lo Vahkhuai ten an runpui sa a, an thawhrinna zuthlum bel nen an damchhung ni an chhiarna hmun a ni bawk.

A ni teh taka sin maw le..! Khawvela nungcha, tui leh khawmual a cheng, thing leh mau zawng zawngte hian kan dam khawchhuah theuh nan mahni saseh mual mual ah rim takin kan thawk theuh a. Mahni puarfan chaw zawngin thang kan kam theuh a. Tumah reng hi kan lo awm mai mai lo. Sa koham te ringawt hian an ngam zawng te an seh bik lo a, ate ber ber thleng hian nunna duhin kan buai vek. A te deuh hnawksak dan a nep mai a, hmuhtham mang loh Vaihmite leh tuhrik thleng hian pawmchilh bombnen an che ve tho. Lu chhum ban chhum huamin an eizawannaah chuan an ring an rawlh ngam ve tho nia. Tawngri lovin an awm hmun sawn mahsuh se, thing leh hnim te pawhin an than zel nan lei lamah an zung ten chaw an dap a, an hnah leh kungte tan chuan an thawhrinna hi a va hlu em. Lawmthu hrill ve niawm fahranin, par chi an par a, rah chi an rah, an hnah mawina chhuahtu ten zahpui an nei bil lo. Hringmi pawhin kan damkhawchhuah nan a dik a dawk, a mawi leh mawi lo

thlengin kan hamkhawm a. Tumah hi in dem thei kan lo ni lo ve. Heng zawng zawng hi Chatuan Pathian remruatna Policy-puanzar hnuaiia rem taka lo insuihkhawm vek hi a lo ni zawka. Chuvang chuan alawm, "Van rorelna ah min telh ve lo" ka'n tih tak chu..! Kan Pathian hi a va ril em ti raw...

Chutia hla tak thlira van dum paw ruai mai kar nen lama suangtuahna thla zara khawvel pum ka hrut mek lai chuan... Chhim lam aţang hian Chhumdum hi a rawn let but but mai a. Chung tlang mawi fahran, favang inţan boruak no nghulh maiin a cheimawi chu rei loteah a rawn chim pil ta mai a. Ngaihtuahna min sen hnem tirtu lek zawng a ni. Aw...heng chhum te hi khawi aţanga rawnin hawrkhawm tak chu ni maw..? Khawilai hmun tak hi nge maw in tawm puk chu lo ni le..? A hma zawng te khan khawiah nge maw in lo awm..? Reiloteah chuan khawpui ri chuan a rawn um a, a zuitu thawm chu rapthlak tham a ni. Chung rite chu khawilai aţanga rawn pek chhuah nge, light & sound duty-te hmel hmuh tur a awm si lo. Kawl phe lah chu an tan meichher kengtu niawm fahranin kiltin chu a fangkual puat puat a. An information-changtu a ni ta ve ang. Hnehna hla do rawn puang niawm

fahranin  ek lah chu a rawn in hrosa a. Thu hlawm lian tak tak rawn thlen nei niawm fahranin rusum a rawn thlak kuk kuk mai. An in peih fel thawkhat hnu chuan ruah mal an rawn thingthla  an a. Reiloteah chuan ruahpui chu dawnsen rual loh khawpa tamin an rawn thlen ta. Heng tui zozai rawn phur khawma, khai rual taka rawn theh thla a, hunbi dik tak chhiar thei khawl, thil rit phur thei leh changkang hi an rawn keng tel anih chuh..! A mal malin man khawm tum ila, an lo in bihruksiak leh daih emaw a ni ang a. An nihna leh an theihna, an rawng leh an chanvo in ang miah lo te hian engtik lai ata tawh nge thawh hona thuthlung hi an lo ziah fel le. Ka chhut thiam lo, "Ka chhandamtu I thuruk hi...."

Chung  angrual pawlte chu reiloteah um bo ang maiin an reh leh ta duak a. "E,... a tawk e, duh tawk tawh rawh u" ti a thupek dawna nei niawm fahranin an tawlh liam leh ta duak a. Khawi lamah tak  uan tum leh ang maw...an in saseng ta duak mai si. Reiloteah chuan Chhimbal rawng chuan tlang luikawr leh luikawr kanin a rawnin zam kul phun mai a. Hengte deuh deuh hian ka thluak chu a ti buai zual a. Heng rawng chi kim, van boruak engthawl kara rawn mawitu

kut themthiam zia chu ka ngaihtuah a. I mak reuh mange, tluk loh rim hi chu i nam maw le... tih mai loh chu sawi tur a vang viau. Kan khaw pa ho hi sawmkhawmin heng rawng chi hrang hrang hi mawi ve turin van boruakah han inzar pharh ve dawn ta ila, thenawmpa Ngurkhuma te hi zawng, nilengin ring kham urhin a hawi mai mai ta ve ang. Van chu sawi loh in chung chen lekah pawh boruaka tang tura rawng han bel thiam awm hi an vang teh e. Mitkhapkar lohah chu pawh chu a thamral leh ta mai a. A thuhrukna hmunah chuan a tir bo leh ta . A hunteah chauh a rawn chhuah tir leh ang.

Kei mimawl ngaihtuahna hian a Pathian zia hi chhui chhuak pha lo mah ila, a ropui zia ka hmuh belh thin avang erawh chuan tlawmah ka la phal lo. Van boruak thengreng, lei chhungril leh pawnlam thleng thlenga tehna hrui an zam chhuah danah te hian min va rawn lo em. Chhun leh zan inkarah palai turin Ni a ruat a, palai rinawm tak chu a ni....! Tuma sawi sel theih loh turin hunbi in ang min siam sak a, rethei leh hausa, nungcha, thing leh mau chenin hun thuhmun min pe. A ti tawi lo a, a ti sei bik hek lo. Arsi maktaduai têt te khian an thlawhhma kawng an zawh sual ngai lo a, an losulhaw

lam pawh an bo ngai hek lo. Khawvel hi boruakah a khaikang a, banpui leh thawmmawlah boruak te chu a tanrual tir bawk. Lui tui zawng zawng tuifinriatah an luang lut a, lui zawng zawng hnar chu tuifinriat hu zam vel a ni lawi si. Nungcha ten an riah buk an sual hlawhcham ngai lo va, ei tur tlakchham vanga tampusimithi an pumpel. Thli te chu a sawmkhawm a, tanrual turin thu a pe a, an in koh khawmna thu lah chu mita hmuh theih leh bengahriat chi lam a ni lo. Chu inbiak pawhna hrui chu leilung dap hian a thlung kual vek a, hriatna thazam angin a phan chhuak vek a ni.

Van rorelnaah hian min lo telh ve lo Chiang kher mai, ka tla e, ka tla hneh khawp mai. Heng zawng zawng hna thawh tur siam a, an hunbite thliak sak a, time table-rem-sak vek thei Pathian chu ka ngaihtuah a, Ropuinate, Chawimawina, Lalnate, Thuneihnate, Van mipuiten an lo hlan nawn awn awn te chu awm ka ti zual a. Kei mihring depde, mahni thih hun pawh hre pha lo leh min zalhna tur thlan khur pawh mahnia inlahi chawp thei lo tlawm zia chu pho lanin a awm a. Van leh khawvel chu sawi loh, mahni chhungkua pawh rel fel zo lo hian chapona kawr nen Van Lal ka lo kar ve pang pang thin te



chuan min ti zak zual. Mahse, heti chunga kan tel lova tlei duh lo va, van thisen lei daia a rawn luan kang tir phal leh si te chuan min ti lawm a. Chatuana sual sernung reh thei tawh lo tur min ti dam a, van runpui sutbân min han vawn tir ve ringawt pawh hi ka tan chuan a tawh tawh reng a ni.

Van rorelna khawlpuiah chuan min telh ve lo mahse, chatuana rorelna thuthluk siam chu a sual ngai loh avangin kan tan hian a lo him tawh a. Kan pian hma ata tawh chhinchhiahin kan awm a, thihni ban zo lo khawpa hnutchhiah leh hlamchhiah pawhin kan awm hek lo. Roreltu thutlukna siam kan tawn fuh chang hian mihring lam hi a lo nghing dawt dawt a. A ðhente chu an lo rum a, "Rumin ka nghak ram ropui chu; lo hnai rawh Lal Imanuel"....ti tein, "Nitla ngailo Zion khawpui, Ngaiin ka Rum ka ðap chhun nitinin".....an lo ti vawng vawng a. A ðhente lem chuan, "Vanduai bik reng kan

awm lo Lalpa remruatnaah; hlim takin kan leng kan leng a ni" an lo ti mai bawh. Kan Pathian rorelna fel tak hnuai ahian mi chi tin reng hi kan kun a. Pathian rorelna nghak zo lo a mahni thu thu a ro hnan lo neih ve chingte hi an vui ðhin a, a roreltu zawk ka dem e te an ti ðhin. Mihring ruahmanna hi chuan nikhat pawh a daih meuh lo a, Chatuana roreltu hi chuan lamlian zau tak angin kawng min sial hnan vek a. Chu roreltu kawng siam lam kan zawh dik hun hunah, Van rorelna thu passed- chhungah Van chakna, Van ropuina leh Van hausakna chu kan tem zawk dawn a ni. Mihring lam rorelna hi zawng a tawngchham em mai... Van rorelnaah min telh ve lo mahse, an rorel hmin sa lo chawmpui a, lo hawppui thiam a piang te hnenah Lungmuanna leh Lawmna thuruk chu a pe mai a. Chung nun hlimawmzia chang ve turin, Van rorelna thutluk ang ang pawm turin i nun kha lo buatsaih ve ngam ang che♦

### HRIATTIRNA LEH SAWMNA

Pathian hruainain KÏP Sakawrdai Bial chuan SILVER JUBILEE (Kum 25- na) kan lo thleng ve dawn ta a. Kan Jubilee hi January 27-29, 2012 chhung hian Sakawrdai Kohhranah lawmna hun hman a ni dawn a. Sakawrdai Bial KÏP Member lo ni tawh zawng zawngte he hun min hmanpui ngei tur hian kan sawm a che u.

Sd/-  
(LALBIAKZUALA)  
Secretary  
KÏP, Sakawrdai Bial



## HRINGLANG TLÁNG

*Pathian hian a mi hmangaihna hi kawng hrang hrangin a lantir ðhin a. Mi dangin eng atan mah an ngai loh kha tu emaw tan chuan thil ropui tak, Pathian hmangaihna hmuhna hmanrua a ni thei ðhin. Chutiang thil chu kum 1997 Krismas urlawok zan khan kei pawhin a takin ka tawng ve a.*

*Krismas chawlh lai hi inngaihzaawng tam zawkin nupui pasaloh innei tura intiamna hun atan an hmang ðhin a. Kei pawh kum 29 mi ka nih tawh avangin pasal neih hun zet ka ni tih ka inhria. Kum 29 chhunga ngaihzaawng pathum ka neih zinga atu amah chuan an nupui ni turin inneihpuiah min la sawm reng reng hlawm lo mai a. Keimah ka han inen a, ngaihzaawngte ngaihsak thiam ve tak, mahni hma sial lo leh rinawm ve tawok tak niin ka inhriat ve nen, mak ka ti tlat a ni.*

*Mak lehzual chu ka ngaihzaawngte hian heng ka nihna nia ka hriatte hi ka nihna dik tak a nih thu min hrilh vek tlat lawi si a; chuti chung chuan atu amah chuan an nupui atan min sawm lawi si lo. Tun lai ðawng han hawh ta ila, ðhianþhaah kan inchhuah zela ni ber e. Ka kum 29-na ka hman liam dawon hnaih pheih chuan mahni hma ka sial lutuk em ni, ka ngaihzaawng hlimna tur aiin keima hlimna tur chauh ka ngaihtuah em ni tihte ka inzawt sek tawh mai a.*

*Kum 31-na hmel ka hmuh chuan ngaihzaawng thar ka tawng leh a, a hming chu Paul-a a ni. Paul-a chu mi mak danglam tak mai a ni a. Ngaihzaawngte chu an inngaihsak tawon a ni ngai a; mahse Paul-a chuan han ngaihsaka chiauh-au vak te hi a duh zawng a ni tlat lo mai a. A kiangah ka awm chuan a duh tawok mai a, ani lahin ka nih ang chuan min pawm hmiah mai bawok a; kan awlsam dun zaw-phian a. Kan inkar lah chu nghing eih awom lo khatopa mam þha a ni a; a tawp a tawpah chuan pasal tur ka hmu ve ta niin ka inhre nghe nghe a.*

*Krismas kan hman dun kum 2-naah chuan Paul-a chuan inneih a rawt tawh hi ka'n ring khatop mai a. December ni 22-ah pheih chuan nupui pasal thu hlaah kan titi chiam nghe nghe a. Paul-a chuan nupui atan min neih ngei chu a duh tih min hrilh a; mahse hun lo a la ti tlat a. Han tih zui vak ngaihna ka hre lo nain a pawka ti em em thung a. Ka ðhiante chuan an ngaihzaawngte nen an inhualna zungbun an bun tak sup sup a, kei lah chuan ngai ka awoh a ni reng mai si.*

*A tuk, December ni 23-ah chuan thlasik thlipui a tleh chiam avangin school kan chawol a, ni khat han chawlh belh leh chu zirlai naupang tluk zetin ka lawm a, Krismas a hnai tawh bawok nen! Kawngpuite chu vur tla chuan a chhilh bo zo va, thinghnah pawh a khuh bo lo chauh hlawm a; han chhuahvahna mi a nih loh avangin in chhungah inkhungin ka dinhmun chu ka ngaihtuah neuh neuh va.*

*Vur thlipui tleh a ban tan lai vel chuan thutlukna ka siam thei ta a. Ka thutlukna chu innei tura sawmna dawm hi ka mamawh ber a ni lo, ka mamawh ber chu min hmangaihtu leh kumkhua atan min duhtu an awom tih hriat mai hi a ni tih hi a ni. Chuti ang mipa ka tawm theih nan Pathian hnenah ka dil nghal a.*

*Krismas urlawok zan chuan Paul-a chu a lo kal a, ka laizawnten intihhlilmina an buatsaihna hmun lamah kan kal dun nghal a. A kianga awom chu nuam ka tih tehlul nen, chumi zan pawh chuan inneih rawtna lam reng a sawi lo va; mahse tun hmaa ka tuar ang kha chuan ka tuar tawh lo. Kan awomkharom chu a nuam kan ti tlang kharop mai. Ka laizawm fate chuan Krismas thilpek an dawm chu hlim em emin an hawng a, Paul-a pawh chuan nuam a ti hlein ka hria. Zan rei lamah chuan kan in mangtha a, Paul-a nen chuan kan fiansan ta a.*

*Kan in lam pan chuan kan inkhalh hawng nghal a, Paul-a chuan min muthillhsan kawng tluan a ni ber. Kawngpui chu a ro hle tawh a, kawngkamah chuan thing a ding pheuh pheuh va; van thiang kukah chuan arsate chu an eng tuar hlawm a; zan mawina an belhchhah takzetin ka hria. Kan in kan thlen dawm chuan thing ding bawrkharom khat chuan ka ngaihtuahna an la peng ta a. Thing ding dang ka hmuh ang lo takin hnah hring mawi takan put bik awangin mak ka ti hle mai a. Khua pawh a lum ta sawtin ka hria. Vur tla hi ka lo hmu fo tawh a, thing hnaha vur khawm tling pawh ka hmu hnem tawh; mahse chumi zana vur ka hmuh chu a danglam bik tlat a, an eng setin ka hre nghe nghe a.*

*Thing ding mawi tak tak ka thlir reng lai chuan ka thinlung chu lumna mak danglam takin a rawon tuam ta a; thilmak danglam tak zawng a va ni em! Thing hnah mawi tak tak chu ka tisa mit chuan ka hmu ngei mai; mahse thlarau mit zawka ka han thlir meuh chuan an mawizia chu sawifiah thiam rual a ni lo.*

*Chumi zan, kum 1997 December Krismas urlawok zana boruak chu a thianga a, mi a tihlimin a muanawom em em a; vanah lah chuan arsate chu lungghlu tha mi ang maiin an de sep sep sep bawok si. Pathianin min awompuina atakin ka chang ta veng veng mai a, a naromzia leh thlamuan-thlakzia chu tuin nge sawifiah thiam tehlul ang le!*

*Ka thil tawm chu Pathianin ka farongtaina min chhanna a ni tih ka thinlungah Chiang takin ka hria. Pathianin amah chu inneih zungbun ai pawha hlu zawk a nihzia Chiang takin min hmuhtir a, ka thinlung chu lawmnain a luangliam zawih zawih a ni ber. Chumi zan, Krismas urlawok zan chuan Pathianin thinghnah, vur hmanga lungghlu ang maia mawi taka a khuh chu min hmuhtir a, a hlutzia hmu turin ka thinlung mit min tihvarsak bawok a. Chu thil hmang chuan Pathianin a mithmuhah mi hlu tak ka nih tih a rawon tilang ta a ni.*

*Ka bula ka bialpa Paul-a a muthillh bawrh bawrh lai chuan Pathianin thilmak min hmuhtir awang chuan lawm awangin ka biangah mittui a luang zawih zawih a, ka thinlung chu a muang hlih hlih a; Chatuan thlenga min hmangaiha min pawm duhtu ka tawng ta tih ka inhria a. Chu chu kawppui atan sawmtu neihi a pawhin a let sang tam takin a hlu zawk tih ka hre bawok.*

— Cynthia J. Teixeira (Source : Alabasta)

## Music Bible-ah

— Upa Lalrinmuana  
Upper Republic

**K**an thurin bu Bible-ah Music hian hmun pawimawh tak a luah a. Tlem han tarlang ila.

Hebrai (Israel) ho chanchin kan en chuan, an hnam nunah thil pawimawh leh hun pawimawhah Music a lang tel zel tiin a sawi theih ang. Juda-te chanchin ziaktu hmingthang tak, Josephus-a chuan 'Hla, Hla satu, a puibâwmtu (Instruments) leh zai tih angte hi vawi 575 Bible-ah hian a lang a ni,' a ti. Tin, 'Solomona Biak In sak hmasak berah khan tawtawrawt nuaihni h leh zaipawl kawr nuaihni h a awm,' a ti bawk. (Kenneth W.Osbeck, The Ministry of Music p.18).

Bible-ah Music lam sawina hmasa ber chu Gen. Bung 4:21-ah "A nau hming chu Jubala a ni a, ani chu tingtang leh phenglawng tumtu zawng zawng thlahtu a ni" tih kan hmu a. Adama ațanga chhutin chhuan riatna a ni. Gen. 31:27-ah Labana'n Jakoba Gilead tlangah a umphak tuma a sawi chu "Eng vangin nge aruka i tlan bo va, mi kal rûksan a, hlimna

te nen, hla te nen, khuangtê te nen, tingtangte nen ka thlahna tur chein mi hrilh loh va" a ti a. Hei hi Bible a khuang lo lanna hmasa ber a ni awm e.

Israel fate Aigupta-ah kum zali chuang lai bâwihah an tang a, chuta țanga an chhuaha tuipui sen an kanin an hruaitu pa Mosia hovin hla an sak thu kan hmu a. Exo.15:1-18 chutichuan Mosia leh Israela thlahte chuan LALPA chawimawiin he hla hi an sa a, an sawi dual dual a...

*"LALPA chawimawiin hla ka sa ang, ropui takin a hneh tâk hi, Sakawr leh a chung a chuang chu tuipuih a paihthla ta a," ..... tiin.*

Exo.19-ah Miriami hovin hmeichhia zawng zawng khuangtê nen an lam nasat thu kan hmu bawk. I Chronicles 6:31-32-ah Temple zaipawl a awm thu hetiangin kan hmu a. "Chungte chu a ni bâwm dah hnua Lalpa ina hla hruaitu atana Davidan a ruatte chu, tichuan Solomona'n Jerusalema Lalpa in a sak hma loh chu inbiakna puan inah chuan hlain rawngan bawl thîn a; a pawl pawlin rawngbawl hna an inchwaw kwal thîn a," tiin.

I Chronicles 23:2-ah Leviah ho hnathawh tur chanvo an insem khan 4000-te chu "Fakna tura thil tumrik chi ka siam," Davida'n a tih te chu hmanga Lalpa faktu turte an nih thu te, 25;1-7-ah Temple Zaipawl Mu-

sical Instrument chi hrang hrang hmanga faktute chu mi 288 an nih thu kan hmu bawk.

II Chronicles 5:11-14-a Solomona'n Temple a sak zawha Thuthlung bawm an lakluh tum khan Levi aho hla satu zawng zawng an hmanraw famkim leh Puithiam 120 tawtawrawt hamtute nen, "Ani chu a tha si a, a ngilneihna chu kumkhuain a awm dawn a ni," tia Lalpa an han fak meuh chuan Lalpa In chu chhumin a khat ta mup mai a ni. Tin, 7:1-6 Temple hlanah pawh chanvo pawimawh tak changtute an ni. Nehemia'n kulh chhia a din thar leh a, a hlan tum pawh khan hla satute chu hmun hrang hrang a tangin an kal khawm a ni tih Nehemia 12:27-28-ah kan hmu.

Kan Bible-ah hian hla a lang tam viau mai. Bible lai takah Sam (Fakna hla) a awm a. Chutiangan hmun tam takah kan hmu a ni. Thuthlung Thar hunah pawh kan Lal Isua pian zanin Van Zaipawlin "Chungnungberah Pathian ropui takin awm rawh se, Lei chunga a lawm em em mihringte hnenah remthu leng rawh se" tiin an rawn thlah liam ngat a nih kha (Lk.2:14) . Lal Isuan a hun tawp dawnah a zirtirte zanriah hnuhnung a kilpui pawh khih hla an sa a, an sak zawhah Olive tlangah chuan an kal ta a ni tih kan hria

(Mat.26:30). Tirhkohte Thiltih 16:25-34-ah Tirhkohe Paula leh Sila lung ina an tan tuma an hla sak kha, hla sak avanga thil thleng zawng zawngah chuan a la ropui ber awm e. Mitangte'n an ngaithla a, lir nasa takin a nghing a, tan in lungphumte lamin a nghing a, kawngkhar zawng zawng a inhawng nghal vek a, mitin kawlbunte a inphelh ta vek a. Chu aia ropui leh pawimawh zawk Thlarau chhandamna tangvengtute chhungkuaah a thleng ta a, a zan la lain Baptisma an chang nghal. Kristian Chhungkua a lo din phah ta reng mai a nih chu !!

Thupun 4:8-ah chuan van miten chhun leh zan chawl lova "A thianghlim e, a thianghlim e" tih an sak thu kan hmu a. KHB No.146-na hlaah pawh hetiangin kan sak thin kha - *'A hmangaih tunah kan tem chauh va, Ama hmingin, lawmin kan khat a; Van thlen hunin eng nge awm leh ang, Beram No Thianghlim kan zaipui ang,'* a la ti fan mai a nih hi.

Music / Fakna hla hian chawlh leh reh tak tak hun a nei dawn lo a ni mai thei. Chuvangin dam chung rei lotêah, hla sa a, Pathian chawimawia fak hi kan ning a nih ngat chuan Chatuana zaina hmunah awm nuam kan ti lo mai thei asin!!

## HRISELNA ■■■

**R**a chhass tē hian rin aiin a ngam thui ru riau mai a. Kei lah rawngbawltu ka ni si. A chang pheih hi chuan 'pa lo' min ti deuh riau thinte hian ka hria a. Ka tlawmngai a ni. Ka then phal bawk si lo. Kawng min kawhmmuh teh, plizz. — Bawla

**A**Pa lo ngam mipa an awm tawh mang lo emaw tih laia i lo la awm hlauh chu thangtharte zirtir nan a va'n tha em! Rawngbawltu fak tlak i ni.

A hmeichhia zawkin an ngam riau mai hi chuan ngaihtuah hi a tawi turh mai a. A rawng kan bawlsak Lalpa ngaihdamna zauzia hmachhuana ngaihdam ngaia awm leh mai a awl viau awm asin! 'Hre reng chung a tvisual chu a tan thihna a ni' tihte hi kan ngaihtuah thleng phak tawh thin lo fo si a.

I chhass tē hian a ngam huai riau chhan hi eng nge ni ang? Mipa zawk pawh a nawr chep thui ngam viau che a nih chuan mi dang pawh a lo nawr thui viau tawh tihna a ni thei a. Chuti a nih chuan nang ang mi fel tan neih tlak a ni lo tihna a ni ang.

A hmangaih leh duh lutuk che

avangin mawi leh mawi lo pawh sawi lovin a bawh ruak ruak che a ni thei bawk. Chutiang a nih chuan i duh dan hrilh la, innneih huna a present theih hlu ber chu a thianghlimna a nih avangin inneih zana pe tur chein hrilh ang che. Tin, Pathian remtih zawnga inngaihazawn i duh thu hrilh la. Hmeichhe tha tak a nih chuan a zah (respect) sawt che ang a, a nih loh chuan i then buai ngai lovin a then mai ang che.

Hun remchang in ngah lutuk avangin a huaisar ve mai mai a ni thei bawk ang. A falin inkawm tlem ula, thlemna a tlem ang.

Kristian tha tak i ni tih a hriat a. Tlawmah la reng reng suh. Kristian nula leh tlangval tana hmangaihna tehfung tur pakhat chu 'Lalpa tih mi a ni em? tih hi a ni. Lalpa tih mi chuan A duh loh zawng ti turin mi a nawr ngai lo. Nangmah leh a rawng i bawlsak Lalpa inhlattir theitu chu hlat daih mai rawh. I fakawm ta sa sa. Chu aia chhan ho zawk avang pawh chuan mi an inthen thin alawm. A chhan hi a ropui bik dawn tlat♦

(He zawhna leh chhanna hi Mission Veng Branch KTP lehkhahu chhuah 'Thuruk 90' atanga lakchhuah a ni)



# KANTU

Rawpuichhip Br. &  
Lunglei Venglai Br.

## RAWPUICHHIP BRANCH

**R**awpuichhip Bial, Kohhran paruk zinga bial thuthmun Rawpuichhip Br. ka kan a. Rawpuichhip Br. hi February 24, 1957 khan din a ni a. Branch Leader hmasa ber chu Pu Lairothanga (L) a ni a, Secretary hmasa ber chu Pu Liandala (L) a ni. Tunah hian member mipa-150 leh hmeichhia-60, an vaiin member 210 an ni. Kohhran Upa chatuan ram pan tawh te hming chawiin Group-5 ah -Upa Muanthanga, Upa H Rothuama, Upa H Lalhlira, Upa Dengthuama, Upa Vankhuma group ah te an in then ani.

Branch tihchak na turin Sub-Committee pang - Decoration, Evangelical Cell, Reception & Ushering, Light & Sound, Programme Sub-committee te an din a. Kawng engkimah branch kut ke ber an ni. Kohhran zaipawl mumal takin an nei thei a, Inkhawmpui leh Kohhran hun pawimawh hrang hrangah an zai thei a. Tun thleng hian Kohhran zaipawl hi tuang takin an la kalpui thei a ni.

Kristian Thalai chanchinbu hi copy-35 (2011) an la mek a. Tin, Branch chanchinbu 'Rabboni' kartin kum 2004 a tang khan chawl lovin tun thlengin an la tichhuak thei reng bawk a ni. Missionary pakhat an chawm mek a, an branch a tang hian Pastor pakhat a chhuak tawh a ni. Member hla te pualin Kohhran inkhawm ban apiang in tawngtaina hun an hmang ziah thin.

Kohhran member boral an awm in Pathianni tlai remchang hmasa berah inkhawmna hun an hmanpui thin a. Tin, K.T.P member boral an awmin ngaihhuina thuziak te pe in an ral thin a. K.T.P member Biak In hawnga nupui/pasal nei an awmin, Certificate frame sa leh Holy Bible te an hlan thin ani.

Sum tuakna kawngah thawh hreh an nei lova, Group tin te budget siam leh Faith Promise te hi sum tuak nan an hmang tangkai hle a ni. Kum khat chhung in Rs.70,000-Rs.90,000 te an thawk chhuak thin a ni ♦

## LUNGLEI VENGLAI BRANCH

Mizoram chhim lama Branch lian ber pawl, Lunglei Venglai Bial chhunga 'Lunglei Venglai Branch' hi ni 6.10.1985 khan a ding tan a. Tunah hian member 160(mipa 109, hmeichhia 51) an awm a. Kumtluanin member lut leh chhuak an awm reng a ni. Member engemaw zat hmun danga lehkha zir an awm a. Kum tawpah member awm bote anlo haw laiin, member thenkhat mahni khaw lama haw an awm baw a. Haw te hi member active tak tak te an nih thin avangin Krismas leh kumthar vuakvet lai te hian an khua a har thei hle a ni.

Kum 2011 chhung khan Bial pawn atangin Maubaw West Branch leh Kolasib Venglai Branch ten an tlawh a, Branch lian leh changlung zawk ten an tlawh thin hi lawmawm an tih bakah an tangkaipui thei hle a ni.

Tunah hian Kohhran kaltlangin missionary pahnih an chawm meka. Kristian Thalai copy 50+ (2011-ah 47copy) an la baw. Central KTP atanga tih tur te an ngaipawimawh thin hle. Thlakhat a vawihnih chhuakin 'KTP News Letter' chu man lovin an tihchhuak thin a. Kohhran Zaipawl member inruat chhuak tham an nihloh avangin Kohhran zaipawlah hian a mi inpe apiang an tel mai a ni. Mumal takin Kohhran Zaipawl an nei thei. Kum 2003-a Zoram pum Zaipawl intihsiakah khan 14-na an lo ni tawh nghe nghe a ni. Kum 2010 khan Branch Silver Jubilee ropui takin an lo lawm tawh a, Branch memberte hi inlungrual

leh hlim tak an ni.

A tlangpuin thawhtan zana hian member 30 (19.12%) vel inkhawm thin ang an ni. Sermon, Kum Puan Thupui zir, Sharing leh hlazir nan te hun an hmang thin. Pathianni zan inkhawmban apiangin an tawngtai ho thin a. Thawhtan zan vawi thumna inkhawm banah thingpui an inho thin. Tin, Pathianni hmasa ber tlaih chawnghei tawngtai an nei thin. 'Member inkhawm kim tum zan' te buatsaihin hun hlimawm tak an hmang thin a. Kohhranah chhiat taw an awmin remchang hmasa berah fellowship an nei pui thin. Biak In hawnga inneite hnenah Citation, Holy Bible & Rs.1000 man hu thilpek an pe bawk thin. Memberte intihchak nan sport an nei bawk thin. Kum tawpah Advance Christmas hmangin kumthar a hruaitu turte an thlang nghal bawk thin a. Tin, kumtluana KTP chetvelnaa member entawntlak an tihte King leh Queen atan thlang bawk thin a ni.

Branch tichak turin Group hnihah an inthen a. Group Budget atan Rs.10,000/-(2011) ve ve tuk an ni. Group Nite an hman thin bakah Group pahnihte hi Kohhran leh KTP inkhawm, fellowship a kal thatah te an inel thin a, kum tawpah lawmman an siamsak thin a ni.

Programme committee tha tak an nei a, sport sub-committee an din baw. Tin, Faith Promise te an siam bakah sum tuak nan Group budget te, thawhtan zan thawhlawm leh thawhtur awm apiangte thawkin sum an tuak thin a ni♦



# Keimahni



- November ni 9-12, 2011 chung khan Zarkawt Kohhran Hall-ah Channel of Hope tih thupui hmangin HIV/AIDS chungchang zirhona Central KTP leh Shalom ñangkawpin buatsaih ani a, Aizawl khawpui chung KTP Branch tin añangin HIV/AIDS-a hmalatu tura ruat bik ñheuh koh an ni a, mi 101 zet an tel thei a ni.
- November ni 11-13, 2011 chung khan Cachar Kahrawt bial huap Leadership Training leh Solfa Training Kahrawt Kohhranah neih a ni a, he hun hmanpui hian Upa Lalrinmuana, General Secretary leh T.Upa Dr. Samuel Vanlalhlhanga, C/M te an kal. Training-ah hian mi 50 vel an tel a ni. Hruaitu kalte hian Pathian biak inkhawmah thuchah ñum hnih ve ve an sawi.
- November ni 11-13, 2011 chung vek khan Mamit Hmunsam Kohhran Biak Inah Hmunsam Bial KTP Leadership Training neihpuiin T. Upa Lallianmawia leh Pu Saizamliaana Sailo, C/M te an kal a, training-ah hian mi 96 zet an tel. Hruaitu kalte hian report pek bakah thuchah ñum hnih ve ve an sawi a, inrinna zan añangin Mizoram Synod Choir ten hun an hmang bawka ni.
- Krismas vuakvet ñhianghlim zawka kan hman theihna atana hmalakna pakhat atan kan Kohhran chung tinte hnenah thuziak sem a ni a, December thla chung khan bialtinah thuziak hi semchhuah a ni.
- December ni 5, 2011 (Thawhñanni) khan Synod Bookroom (Hqtr) kawtah KTP General Conference 2012 Hlabu ñlangzarh leh Pathian hnena hlanna neih a ni a, hlabu Sub-Committee Secretary Pu Zohmangaiha, C/M in report pein Rev. Zosangliana Colney in Hlabu hi a ñlangzarh a ni.
- December ni 16, 2011 (Zirtawpni) khan Synod Choir member Nl. Lalhmuzuali leh Tv. H. Laldinmawia, Zozam Times Editor-in-Chief te chu Biate Kohhran Biak Inah an innei a, kan lawmpui hle. Mahmuzuali hi Synod Choir member ten an ñawiawm a ni.
- December ni 17, 2011 (Inrinni) khan Central KTP buatsaih Chhanchhuahna Camping-a camper te pualin Synod Choir Cabin-ah Advance Christmas hman a ni. He hunah hian CKTP, Synod Choir leh Camp chhuak ten hun hlim takin an hmang a, Gift Exchange neih a ni bawka.